

“U Evropu možete jedino ukoliko budete saradivali”

Visoki predstavnik se danas sastao sa liderima političkih stranaka koje imaju svoje predstavnike u Parlamentu BiH i pozvao ih da sarađuju u interesu svih građana Bosne i Hercegovine kako bi BiH pripremili za pregovore o evropskim integracijama koji trebaju započeti sljedeće godine.

Visoki predstavnik je liderima političkih stranaka rekao: “Vi kao lideri parlamentarnih stranaka BiH imate odlučujuću ulogu u pripremanju ove zemlje za integraciju u Evropu. Svi zajedno imate snage da Bosnu i Hercegovinu dovedete u fazu u kojoj će tokom druge polovine naredne godine moći započeti pregovore sa Evropskom komisijom. Na vama je da odlučite o tome da li ćete to učiniti i o načinu na koji ćete to učiniti. Međutim, bićete uspješni jedino ukoliko pronađete nove oblike saradnje u interesu BiH, možda putem formiranja “Saveza za Evropu” (*Compact for Europe*), kao što su to učinile političke stranke u Češkoj Republici, Mađarskoj i u drugim državama. Oni su znali da će zajednički doživjeti uspjeh ili neuspjeh.”

Visoki predstavnik je rekao da od danas pa do 30. juna 2004. godine imamo 222 dana. Naglasio je da će biti potrebno iskoristiti svaki dan koji nam je na raspolaganju ukoliko želimo imati šanse da ostvarimo stvarni napredak u provođenju ovog izuzetno obimnog programa rada koji je Evropska komisija zatražila od BiH u utorak u svom izvještaju o studiji izvodljivosti (*feasibility study*). Ukoliko ne ispuni 16 uslova iz ovog izvještaja, Evropa će Bosni i Hercegovini reći ne. Visoki predstavnik je jasno rekao da OHR ne može pokrenuti i provesti reforme koje su potrebne za ispunjavanje ovih uslova, nego da to moraju učiniti političari iz BiH.

Visoki predstavnik je na kraju rekao: “Za svakog građanina BiH

koji je prošao toliko bola i patnji bilo bi katastrofalno da bh. političari ne urade ono što je potrebno uraditi da san o Evropi postane stvarnost. Ja vam neću reći ni kako da saradujete ni da li trebate međusobno sarađivati. To je naravno vaša odluka, vas kao političkih stranaka. Međutim, mogu vam reći sljedeće: ukoliko budete sarađivali uspjećete i to će biti vaš kolektivan uspjeh. Ukoliko ne budete sarađivali nećete uspjeti i to će biti vaš kolektivni neuspjeh."

Sastanku su prisustvovali gospodin Bariša Čolak (HDZ), gospodin Dragan Kalinić (SDS), gospodin Husein Vojniković (Stranka penzionera), gospodin Krešimir Zubak (NHI), gospodin Milenko Todorović (SRS), gospođa Mirjana Đorđević (BOSS), gospodin Nebojša Radmanović (SNSD), gospodin Refik Numić (Republikanska stranka), gospodin Rifet Dolić (DNZ), gospodin Safet Halilović (SBiH), gospođa Seada Palavrić (SDA), gospodin Tihomir Gligorić (SPRS), gospodin Vinko Radovanović (PDP) i gospodin Zlatko Lagumdžija (SDP).